

## Pippi Langstrumpf (Markus Kleiner 2025)

Samstag Morgen zum Start nach Begrüssung (ca. 9:35)

Was het sie jetz scho wieder gsunge  
Das chline fräche Meiteli  
Mit Name Pippi Langschtrumpf?  
*Zwei mal Drei macht Vier*  
*Widewidewitt*  
*Und Drei macht Neune*  
*Ich mach mir die Welt*  
*Widewide wie sie mir gefällt*

D Wält  
Wie si mir gfallt  
Das tönt guet  
Und d Chile  
Wie si mir gfallt  
Das tönt no besser aus guet  
Dört häre flügt mi Huet

*Zwöi mal Drü macht Vier*  
*Widewidewitt*  
*Und drü macht Nüün*  
*I mach mir mi Gmeind*  
*Widewide wie si mir guet gfallt*

Ja, was hätten sie denn gerne?  
Geben Sie Ihren Wunsch ein und drücken ENTER!

Oder bim Aladdin  
gisch di Wunsch ii  
bim Fläschegeischt Dschinni  
Und all dini Wüsch wärde wahr u si dini

Wenn i jetz chönnt wünsche  
Wie würd si usgseh  
Mini Troumchile?  
Wär's e Sehnsucht nach meh?  
Chönnt me dört spile?

I danke a d'Pippi Langschtrumpf  
Und ihri Villa Kunterbunt  
Heiterefahne  
Das wär's doch  
I würd alles la schta u ga  
U dört härefahre

I wett mi nid müesse versteue

Wett si  
wieni bi  
Wett Ruum ha für Fantasie  
Für chlini u grossi Frage  
U mi chly  
Egge woni wäg ha  
Dä ghört zu mir  
Wäg däm wetti nid müesse blibe sitze  
Zu däm wetti chönne schta

U mini Zwiifel  
Dörfe vom Bode uuf  
Uf dr Tisch ufe schta  
So wie ds Ross *Kleiner Onkel* vor Kunterbunt Villa  
Sech im Schiinwärferliecht zeige u tanze u verneige  
Und sech uf ne Zuegab verschteige

I bruuche e Ort wo mi Zwiifel darf si  
Und nid wird  
problematisiert  
schubladisiert  
terrorisiert  
wägbätet  
Und am Schluss  
Wird drüber gschwüige  
Und ds Gschpräch dadrüber  
Wird tunlichst vermeide

Nei, i bruuche e Ort  
Woni mi Zwiifel darf füre nä  
Uufschteue  
Aamale  
I d Luft ufe häbe  
Bravo rüefe  
Luut säge:  
i zwiifle  
das isch doch ds Läbe

I bruuche so ne Villa Kunterbunt  
Ganz wiit  
Ganz ohni Dresscode  
Mit aune Farbe  
Gelb, Grünen, Blau, Orange, Rot  
Vo mir us o gärn mit em Ross *Kleiner Onkel*  
Und em Äffli *Herr Nilsson*

I tröime vo somne Ort  
Wo die einte Spaghetti ässe  
mit Gable u Mässer  
Anderi ässe  
mit Löffu u Gable

U wieder anderi mit dr Schäri  
So wie d Pippi Langschtrumpf  
I tröime vo somne Ort  
Wo e Liechtigkeit isch u mängisch o e Schwäri

I tröime vomne Ort  
Wo mer gmeinsam ds Läbe diskutiere  
Mitenand um d'Hüsser schtriele  
Wo mer a üsem Gloube fiele  
Wo mer nöii Wörter erfinde  
Zum Bispiu ds Wort  
*Spunk*  
Und üs a däm düe häbe  
O we mer nid wüsse  
was das gnau wott säge

**Mir wage  
mit üsne Frage  
z'läbe.  
Mir rage  
mit üsem Läbe  
i d'Frage**

-----

I tröime vo somne Ort für mi  
Wo ni darf si wieni bi  
Wo ni öppis Nöis darf usprobiere  
Wo mer d'Fähler nid düe beschtrafe  
sondern düe fiire  
Wo ni darf spinne u luut danke  
Wo mer nis nid müesse vorenang verränke  
E sone Ort sueche mer doch all i üsne Tröim  
Wo mer chöi abe schtige vo üsne höche Rösser  
u vo üsne Böim

Villa Kunterbunt

Chönnt i mir d Chile mache so  
Widewide wieni wett  
Eggig u rund.  
De wünschti mir 'se  
als Villa Kunterbunt